



楊千嬅出席活動時透露 11 歲囡囡 Torres 現於上海讀中一，大讚囡囡生性，懂得分配時間讀書，十分安慰。不過她大呻與囡囡似有代溝，不會跟她談結識了什麼朋友，更遑論對方會跟她分享感情事，坦言不知道囡囡有否拍拖！

## Torres 上海讀書 不知有否拍拖 囡囡避談朋友 千嬅呻有代溝

楊千嬅、張敬軒、莫文蔚與李幸倪前晚出席慈善晚宴，千嬅透露現時除了工作，平日亦要照顧 11 歲兒子 Torres，目前巡唱檔期排至明年農曆新年。問到是否豬籠入水？她說：「唔係，有得唱就唱，年紀開始大，體力上保持到，都想盡量做自己想做嘅嘢。」續指正籌備推出廣東歌。問到囡囡 Torres 有否投訴她太忙？她說：「佢啱啱升讀中一，功課多咗好多，佢開始有自己嘅安排，好似一下子大個咗好多。我都好安慰，佢比細個嘅時候定性咗，會規劃好自己 Schedule，呢方面佢比較似 Daddy。」

問到會否安排囡囡返港讀書？千嬅說：「佢有諗，但希望暫時留嗰上海讀書，讀埋呢個學期先再作打算。」問到兒子有否拍拖？她大呻：「有都唔講啦！唔好話係女朋友，就算係朋友都唔會第一時間問畀阿媽知。（有冇同你提起女同學？）佢同我討論地理，咁我梗係唔識啦，咪即係話題完結。」提

到早前有網民邀她合照，她叫對方低調一點，千嬅坦言：「如果喺街見到我，走埋嚟合照冇問題，我反而唔鍾意唔知匿埋喺邊度影我，會覺得唔舒服，影得唔靚出嚟有手尾跟！」

### 張敬軒組男女混合足球隊

張敬軒表示為慈善晚宴組織擔任文化藝術大使，希望將香港藝術家帶到國際。他又稱會與朋友打機過中秋節：「我本身鍾意玩格鬥 Game，不過最近愛上運動，所以有玩足球 Game，打機之餘仲落場踢波，不過仲未搵到踢咩位置，朋友話我暫時嘅狀態最適合做啦啦隊，哈哈！」他續稱小時候踢過前鋒，記者即提議他跟經理人公司的波友組「英皇足球隊」，他笑言：「我驚唔夠人呀，一係搞男女混合隊，衛詩雅都踢得吓，佢乜都識啲。」今年是莫文蔚（Karen）入行 30 周年，她透露稍後舉行個人小型展覽，展出物品包括 20 多年前推出的限量版寫真集。問到短期內是否留港生活？Karen 即點頭，又指媽媽剛過 84 歲生日，故會多陪對方。



■張敬軒與莫文蔚老友鬼，一見面即講個不停。

■李幸倪性感赴會「肩」係索。

## 難跟意大利男發展

### 蔡思貝：大家太熟

何廣沛、蔡思貝與吳偉豪等昨日到觀塘宣傳無綫劇《你好，我的大夫》，吸引大批途人圍觀。對於劇集首周 7 天跨平台總收視最高 23.1 點，何廣沛開心稱希望收視繼續升：「大家睇完可以多多支持中醫行業。」有傳他有份參演的《新聞女王》成為台慶劇，記者讚他是「收視福將」，他謙稱：「唔好咁講，個個都做得好。《新聞女王》大家都係想睇佢詩曼，我係叨佢光。」

蔡思貝表示與節目《貝遊歐洲》內的意大利型男相識十載，問到可有機會發展？她表示沒有可能：「大家太熟，不過我同佢幾有緣，每隔幾年就有機會見面，好似我之前先後去泰國同越南做嘢，佢咁啱嚟啲度。」



■劇集收視理想，蔡思貝與何廣沛笑逐顏開。

## 張振朗被催婚 搵朱敏瀚做擋箭牌

張振朗與朱敏瀚昨早出席慈善活動，雖然要一早起床，但二人表示做善事就很精神。提到他們早前幫關曜雋拍物資進行過大禮儀式，張振朗指對方是好兄弟，當然要出一分力。問到會否令他燃起成家立室念頭？他笑言：「其實屋企有兩個姪仔都好開心，遲啲先，你哋都唔係第一次問，哈哈！」之後他轉移視線，叫大家問朱敏瀚。朱敏瀚即強調單身，問到有何擇偶條件？他說：「一齊健身、思想一致、愛我同愛埋我啲朋友，因為我成日都見朋友，如果佢唔愛我啲朋友會好大鑊！」



■張振朗（左）與朱敏瀚一向熱心公益。



■羅嘉良樣貌十年如一。

## 羅嘉良被質疑戴假髮

一連兩場在紅館舉行的《情牽輝煌經典演唱會》前晚圓滿結束，有份演出的羅嘉良在慶功宴上透露，對上一次站在紅館是 2016 年為恩師盧國沾的作品演唱會演出，他表示自小聽黃霑和顧嘉輝的歌曲長大，很有感情。對於網民讚他樣貌多年來不變，他笑言之前在馬來西亞拍劇時，余詩曼曾質疑他戴假髮，他說：「頭髮係真嘅，感謝父母同上天賜予，不過白頭髮多。」

